

Govor prvog zamjenika visokog predstavnika/supervizora za Brčko Louisa Crishocka na ceremoniji obilježavanja 25. godišnjice Brčko Distrikta



Drage Brćanke i Brćaci, dragi gosti,

Dozvolite mi da vam prenesem najsrdačnije pozdrave visokog predstavnika, gospodina Christiana Schmidta, koji vam želi uspješno i sadržajno obilježavanje Dana Brčko Distrikta.

Takođe, koristim ovu priliku da svim ženama u Brčkom, ali i cijeloj Bosni i Hercegovini, uputim najiskrenije čestitke povodom Međunarodnog dana žena, 8. marta.

Četvrt vijeka Brčko Distrikta – nije mala stvar!

Čestitam svima!

Ova značajna godišnjica savršen je trenutak ne samo da slavimo postignuća Brčko Distrikta nego i da sanjamo o budućnosti i definišemo smjer u kojem želimo ići.

Danas je Brčko dobar primjer onoga što je moguće kada se konstitutivni narodi, nacionalne manjine i Ostali udruže i zajednički rade na izgradnji prosperitetne budućnosti.

Ovakva prošlost, obilježena zajedničkim radom, ulijeva nadu i

stvara očekivanja među građanima.

Građani Brčkog očekuju od svojih vlasti transparentnost, odgovornost i konkretan napredak.

Njihova očekivanja mora ispuniti predano i odgovorno rukovodstvo.

Od ključne je važnosti da vlasti Brčkog ostanu fokusirane na daljnji razvoj Distrikta i ne dozvole da se političke tenzije iz drugih područja prošire i na Brčko. Rukovodstvo Brčko Distrikta uvijek je bilo opredijeljeno za zajednički rad u interesu svih svojih građana i to se mora nastaviti, bez obzira na aktuelne političke izazove.

Status Brčkog utvrđen je Konačnom odlukom i Amandmanom br. 1 na Ustav Bosne i Hercegovine, čime je Brčko uspostavljeno kao neutralni, multietnički distrikt pod suverenitetom BiH, u kojem sve zajednice imaju jednak pristup i zastupljenost.

Međutim, važno je imati na umu, kao što sam nedavno izjavio, da Tribunal ima nadležnost nad Brčko Distriktom sve dok se Konačna odluka ne proglasi potpuno provedenom.

Stav 13. i stav 67. Konačne odluke jasno to potvrđuju i ne ostavljaju prostor za pogrešno tumačenje. Predsjedavajući arbitar, ambasador Clint Williamson, i ja – odlučni smo u namjeri da osiguramo puno poštivanje Konačne odluke.

Zadatak rukovodstva Distrikta, Vlade, Skupštine i zaposlenih u javnoj upravi je da očuvaju Brčko kao mjesto koje nudi dobre prilike, a ne vodi u podjele, ostajući pri tome vjerni svojim utvrđenim prioritetima: stabilnosti, dobroj upravi i privrednom razvoju.

Distrikt je sposoban djelovati brzo i efikasno u trenucima kada je to najpotrebnije – to ste pokazali brzinom kojom ste započeli radove na popravljajući mosta Brčko-Gunja, pokazavši agilnost i opredijeljenost da prevaziđete sve izazove.

Na sličan način, aktuelni radovi na okončanju procesa deminiranja Distrikta dobar su primjer saradnje lidera na lokalnom i državnom nivou sa međunarodnim partnerima. Upućujem riječi iskrene zahvalnosti svima koji su uključeni u ovaj krajnje značajan posao. Ovim naporima gradi se snažnija i sigurnija budućnost za sve vas.

Vaš obrazovni sistem je takođe dokaz multietničkog karaktera Brčkog i vizije inkluzivnog društva. Učenici koji se zajedno obrazuju, koji zajedno odrastaju, mogu i živjeti zajedno. Kvalitetno obrazovanje je ključno kako bi se osiguralo da se mladi ljudi u Brčkom razvijaju i pripremaju za izazove sa kojima će se suočiti kao građani i radna snaga budućnosti.

Brčko ima izuzetno povoljan geografski položaj, plodno poljoprivredno zemljište, luku na najvećoj evropskoj riječnoj mreži i potencijal da bude okosnica ključne regionalne mreže puteva.

Distrikt mora nastaviti da jača svoju poziciju značajnog prometnog čvorišta, putem jačanja veza i mogućnosti za ostvarivanje ekonomskog rasta, uključujući i okončanje neophodnih aktivnosti na izradi prostornog plana kojim će se omogućiti početak izgradnje regionalne mreže autoputeva.

Prošlogodišnji uspješno realizirani pilot projekat uvođenja novih izbornih tehnologija na sva biračka mjesta predstavlja još jednu značajnu prekretnicu – unapređenje transparentnosti, izgradnju povjerenja i uvođenje novih standarda za izborni proces u BiH.

Nedavno izabrana Skupština i Vlada prepoznali su izazove koji su pred njima. Implementacija jasne i ambiciozne strategije za borbu protiv korupcije, reforma javne uprave i unapređenje državne službe, biće od suštinskog značaja da se osigura da svi građani vide svoju budućnost u Brčkom.

Na vašoj listi obaveza je puno toga.

Aktivnosti na jačanju ekonomskog rasta, privlačenju investicija, obezbjeđivanju transparentnog finansiranja, unapređenju zdravstvene zaštite i razvoju infrastrukture – ključne su za ostanak mladih ljudi i za Brčko kao mjesto koje i dalje nudi dobre prilike.

Da li je ovo obimna lista zadataka?

Jeste!

Da li je ostvariva?

Naravno!

To je postignuće kojem vrijedi težiti. Kroz saradnju, ne samo da možete biti uspješan primjer, vi možete inspirirati druge da taj primjer slijede. Imate jedinstvenu priliku da budete uzor drugima i da budete izvor nade za građane širom Bosne i Hercegovine.

Iako je ostvaren napredak, ne trebamo zaboraviti da se trajna promjena postiže stalnim djelovanjem i neumornim naporima.

Iako su zadaci pred vama veliki, u ovim aktivnostima niste sami.

Međunarodni partneri nastavljaju pružati podršku Brčkom dok vi radite na ostvarivanju svog punog potencijala.

Neumorno ću ponavljati koliko nas sve ohrabruje činjenica da su saradnja, suživot i zajednički razvoj mogući.

Vi ste ti koji to omogućavate.

Svaki dan!

Živjeti u integriranoj i inkluzivnoj zajednici više je od pukog življenja jednih pored drugih – riječ je o istinskoj izgradnji zajedničke budućnosti.

Ne sumnjam da će Brčko i dalje biti na visini zadatka.

Bit će mi drago da budem svjedok njegove transformacije:
svijetla budućnost JESTE moguća i JESTE nadohvat ruke.

Hvala.

